

NA DEFENSA DUNHA POLÍTICA AGROFORESTAL AO SERVIZO DA XENTE

Xurxo Charlín Trigo, con DI 76.862.042-K, concelleiro do Ilmo. Concello de Cambados, en base ao disposto nos artigos 91.4 e 97.3 do Regulamento de Organización, Funcionamento e Réxime Xurídico das entidades locais e demais normativa que poida resultar de aplicación, presenta, diante do Pleno da Corporación esta moción, en base á seguinte

Exposición de motivos:


Galicia con miles de hectáreas queimadas e lamentando catro vítimas mortais -dúas mulleres perderon a vida en Nigrán, un home faleceu en Carballeda de Avia e outro home morreu en Vigo- acaba de padecer a maior catástrofe natural que ten sufrido a súa superficie forestal nos últimos anos.

A vaga de lumes estendeuse de norte a sur e de este a oeste do país: San Cristovo de Cea, Baños de Molgas, Chandrexa de Queixa, Montederramo, Manzaneda, Carballeda de Avia, e ata 23 concellos en Ourense; a reserva da biosfera de Os Ancares, Cervantes, Monforte, Pantón e Friol e ata 30 concellos en Lugo; Ponteareas, Pazos de Borbén, Redondela, Salceda de Caselas, Nigrán, Vigo, Pazos de Borbén, Salvaterra, Soutomaior, Mondariz, Gondomar, Baiona e As Neves, Ponteareas, Ponte Caldelas ou Mos entre outros en Pontevedra; así como Boiro, Neda ou Negreira como exemplos de lumes na provincia de A Coruña.

Ademais por mor dos lumes, deberon ser cortadas a autovía A-52, a nacional 525, a VG-20, a AG-57, a PO-250 e os túneles de O Folgoso.

A veciñanza dos múltiples concellos afectados coinciden en denunciar a falta de medios de extinción coas lapas nas portas das casas e non comprenden como a Xunta cesou no seu contrato a traballadores e traballadoras dos SPDCIF xusto cando as condicións atmosféricas indicaban a proximidade do furacán Ophelia, había unha humidade relativa inferior ao 30 % e as temperaturas superaban os 30 grados. Condicións ideais para que os incendios sexan practicamente incontrolables.

Aínda non hai un balance provisional de danos: casas destruídas, coches queimados, maquinaria agrícola destruída, animais domésticos mortos, viñas e diversas plantacións inservibles e decenas de persoas sen emprego.



Pero o dano esténdese á paisaxe, ao aire que respiramos, á auga que bebemos, á caza, á pesca, á cultura, á etnografía, ao turismo rural..., unha perda económica, ecolóxica e social

Persoas falecidas, familias desaloxadas, innumerábeis lugares afectados polos incendios, moitos deles Espazos naturais protexidos, Parques naturais, Reservas da Biosfera, ecosistemas de gran valor económico e medioambiental calcinados por falta de medios tanto materiais como humanos, e non tivemos máis desgrazas persoais e máis perdas materiais grazas a profesionalidade e a implicación das traballadoras e traballadores que integran os distintos colectivos forestais e a implicación da sociedade civil.

As perdas de vidas humanas, os custes económicos, ecolóxicos e sociais que os lumes producen nos nosos montes xeran a indignación da sociedade galega. Esta indignación debe producir unha reacción por parte da Xunta de Galicia, levando a cabo políticas de protección dos espazos e de reordenación do espazo agroforestal galego.

O Sindicato Labrego, a Organización Galega de Comunidades de Montes, Frouma, Amigos da Terra e a Federación Ecoloxista Galega abandonaron no mes de xuño o Consello Forestal de Galicia polas continuas prácticas de entorpecemento á súa participación e en concreto pola presentación en rolda de prensa do Plan de Defensa contra Incendios (Pladiga 2017), antes de que este fora coñecido polas organizacións que participan no Consello Forestal.

Polo exposto, presentamos a seguinte **Proposta de acordo**

PRIMEIRO.- Instar a Xunta de Galicia a

1. Democratizar o funcionamento do Consello Forestal Galego.
2. Buscar un Acordo Nacional Estratéxico de Xestión do Monte Galego que conte co consenso dos grupos políticos, sindicatos, patronal, organizacións sociais e propietarios forestais que marque un cambio na política agro-forestal.
3. Modificar -co consenso dos grupos políticos, sindicatos, patronal, organizacións sociais e propietarios forestais- o PLADIGA (Plano Forestal de Galicia e dos Planos de Loita Contra o Lume) centrando o mesmo na prevención no canto da extinción no período de alto risco e garantindo a protección dos núcleos poboacionais, parques naturais e reservas da biosfera.
4. Instar ao Consello Xeral do Poder Xudicial para que dote á Fiscalía dos medios técnicos, humanos e económicos necesarios para mellorar a investigación dos lumes.

5. Elaborar plans de ordenación dos montes que contemplan a ordenación dos cultivos agrarios e forestais e á mobilización produtiva das terras, evitando o aumento da superficie ocupada por especies de medra rápida.
6. Poñer en marcha de xeito urxente plans de restauración e recuperación das zonas afectadas por incendios neste ano 2017 e nos últimos anos.
7. Converter o SPDCIF como servizo único e público de prevención e extinción de incendios forestais profesionalizado.
8. Presentar un Plan de Fomento de implantación de sectores industriais e empresariais que centren o seu traballo na transformación de produtos silvícolas e agropecuarios, na conservación de masas forestais e na prevención dos incendios.

SEGUNDO.- Instar ao goberno do Estado a derogar a Lei de Montes 43/2003, de 21 de novembro, modificada o 21 de xullo de 2015, e a respectar o carácter singular dos montes en man común de Galicia.

TERCEIRO.- Dotar, de selo caso, ao Concello dun Observatorio Medio Ambiental, onde se propoña unha política agro-forestal sustentábel e economicamente rendíbel para a sociedade.

CUARTO.- Partindo do convencemento de que a privatización dos servizos de prevención e extinción dos incendios forestais leva consigo a eliminación de medios materiais, técnicos e humanos e un incremento nos custes de extinción que só beneficia a sectores especulativos, entendemos que os equipos de extinción deben estar baixo un mando único e depender na súa totalidade da Consellaría do Medio Rural. En consonancia, o Concello esixirá á Xunta que asuma todas as labores de extinción de lumes, podendo o Concello acordar asumir baixo convenio as dedicadas exclusivamente á prevención, procurando que ditos medios traballen durante todo o ano, especialmente nos meses de inverno e primavera.

Cambados, 18 de Outubro do 2017.

Documento asinado na Sede Electrónica do Concello de Cambados, Xurxo Charlín Trigo, Concelleiro de Somos Cambados.